

# LUS TXUJ CI

( Words of Wisdom )

*Los Ntawm*

Jay Xiong

Copyright © 2003-2005 **HmongDictionary.com**, LLC

<http://www.HmongDictionary.com>

All rights reserved

**Thov muab cov lus Txuj Ci no pub rau txhua leej uas xav  
kawm txog Hmoob lus thiab Hmoob txuj ci.**

Tus neeg paub Tswv Ntuj txawm nws nyob lub tebchaws twg los  
nws yeej txawj xav.

Tus neeg coj dav txawm nyob lub zos twg los phooj ywg yeej muaj coob.

Tus neeg tsis paub Ntuj yog tus neeg qia dub.

Tus neeg tsis paub hlub yog tus neeg tsis muaj kev ncaj ncees.

Xav paub neeg siab ces tso nyiaj ntawm kev.

Xav paub neeg dev ces tham txog kev plees.

Tswv Ntuj hlub txhua leej, tabsis Tswv Ntuj

Tsis pub rau txhua leej + :)

## LUS CEV

Nyob zoo ib tsoom phooj ywg. Ua tsaug ntau nej tau pab saib phau ntawv no. Kuv vam thiab cia siab tias yog nej nyeem tag, nkag siab, thiab paub txog cov ntsiab lus zoo nyob hauv phau ntawv no, nws tsis yog yuav pab tau nej lub neej xwb, tabsis nej tseem yuav muaj peev xwm qhia thiab pab tau nej tej txheeb thiab tej ze.

Cov lus sau nyob rau hauv no, kuv txhob txwm tsis muab txhais vim tias kuv xav kom nyias txhais li nyias kev xav thiab pom. Yog tias nej leeg twg ho xav kom kuv muab txhais me ntsis, thov nej hais qhia es kuv mam li piav me ntsis qhia rau nej. Qhov tseem ceeb, ib zaj lus twg nws kuj txhais tau ntau yam. Tsis tag li xwb, yog tias kuv muab txhais lawd ces nej yuav tsis muaj kev xav txawv thiab pom txawv lawm.

Phau ntawv no muaj txog li 210 phab ntawv, thiab kuv tseem tabtom muab sau kom zoo thiab tiav xwb. Yog nej leej twg ho tau nyeem ob peb nplooj no, thiab xav tias phau **Lus Txuj Ci** no yog ib phau ntawv muaj nqis, thov nej ho hais qhia kuv paub. Yog tias tsis muaj neeg ntshaw thiab xav tias zoo ces tej zaum kuv yuav muab tso rau hauv kuv qhov vejxaj (website as random quotes) xwb.

### Vim li Cas Kuv Thiaj Sau Phau Ntawv No?

Peb Hmoob yeej ib txwm muaj kev txawj ntse li luag lwm haiv neeg, tabsis vim yog peb tsis muaj ib lub tebchaws. Yog li, peb tsim tsis tau ib co ntawv uas yuav los sau tau peb tej txuj ci cia, thiab muab khaws tseg li. Thaum zoo li no lawd, peb thiaj ua neej tsis vam meej. Ib tsob ntoo twg yuav muaj tawg paj thiab txi txiv taus los nws yuav tsum muaj lub hauv paus, cag thiab daim av. Peb tej txuj yuav nyiam phem npaum li tus nquab lub zes los peb yuav tsum muab sau thiab khaws tseg; es ib tiam dhau ib tiam peb thiaj yuav paub txhim kho kom zoo zuj zus lawm yav pem suab. Yog nej leej twg ho paub tej zaj kuv tsis muaj lossis yog nej tsim tau tej zaj es ho xav kom kuv muab sau rau hauv no, thov nej hais qhia kuv paub es kuv yuav zoo siab tso nej npe rau tom qab ntawm nej cov zaj lus txawm yog qub los yuav tso nej npe rau vim nej yog tus nco txog thiab pab kuv.

### **Yuav Siv Phau Ntawv No Mus Li Cas?**

Phau ntawv **Lus Txuj Ci** no muaj ntau~ zaj lus uas Hmoob hu tias lus tshooj vim nws muaj ob fab los sib tshooj, xws li zaj lus hais tias, “Zoo ntxov zoo rov.” “Zoo ntxov” yog fab ib hos “zoo rov” yog fab ob. Ces ob fab lus no los mus ua ib tshooj. Thiab tseem muaj txuam rau lus paj huam, xws li “Nyuj kub tsis hnav nyuj hau.” Ntxiv mus kuj muaj cov lus kuv hu tias lus “Txuj Ci”, xws li “Ruam noj ntau es ntse noj tsau.”

Cov zaj lus uas muaj “-qub” nyob rau tom kawg nws qhia tau tias yog ib zaj lus Hmoob yeej ib txwm siv thiab paub ntev los lawm. Cov uas tsis muaj li ces yog cov kuv tsim tshiab lossis muab hloov me ntsis los ntawm cov qub lawm. Cov ho yog los ntawm lwm haiv neeg, xws li Lostsuas, Askiv thiab Suav los yuav muaj lawv npe qhia rau nej paub tias yog haiv neeg twg tsim los.

### **Tsis Lees lossis Tsis Lav**

Thov tshaj tawm rau nej txhua leej paub tias cov lus, zaj lus, thiab kev qhuab qhia nyob rau hauv phau ntawv **Lus Txuj Ci** no tsuas yog ib cov lus ntuas thiab qhia txog neeg kev ua neej xwb. Cov lus no tsis tau txhais tias yuav pab nej lossis ua rau nej zoo yog nej ua raws li hais, thiab ho yuav phem yog tias nej tsis ua li hais. Yog li, kuv yuav tsis lees, tsis lav, thiab tsis pab yog tias nej siv cov lus no es ho txhaum kev cai lossis ua rau tub qhaug thiab txhaum lwm leej lwm tus neeg. Nej siv phau ntawv thiab cov lus no ces yog nej lees paub thiab pom zoo tias nej txaus siab siv los ntawm nej tus kheej xwb, thiab nej paub txog cov lus kuv tsis lav thiab tsis lees uas tau hais los no lawm.

### **DISCLAIMER**

Your use of this ebook and these quotes is solely at your own risk. The author and/or Hmongdictionary.com does not guarantee its appropriate use. In no event shall the author or Hmongdictionary.com be held liable for any damages, including general, special, incidental or consequential damages arising out of the use of these quotes.

Rua muag thiaj yuav pom ntuj; rua siab thiaj yuav pom txuj.

Tus ruam hais lus thuam; tus ntse hais lus de.

Lub hnuv qub ci npaum li cas los yog muab faus tseg xwb ces yeej tsis muaj neeg pom. Kev txawj ntse thiab tswv yim zoo npaum li cas los yog zais tseg ces yeej tsis muaj neeg paub.

Tus neeg txawj swb tus neeg ntse.

Coob leej kawm txawj tsawg leej kawm ntse.

Tus neeg txom nyem yog tus paub Ntuj; tus neeg paub txuj yog tus tsis hnav zoo.

Txhua leej xav noj qab, tabsis tsawg leej thiaj kam lauj npab.

Txhua leej xav hnav zoo, tabsis tsawg leej thiaj kam tsoo.

Muaj tsaus thiaj muaj kaj; muaj nkhaus thiaj muaj ncaj.

Muaj ib txoj kev nkhaus zoo tshaj kaum txoj kev ncaj tsis tau tho.

Dab yeej muaj yog yus pom; Tswv Ntuj yeej muaj yog yus ntseeg.

Tus neeg Ntuj pab yog tus lauj npab; tus neeg Ntuj cawm yog tus neeg muaj kawm.

Tswv Ntuj yeej hluv txhua leej, tabsis Tswv Ntuj tsis pub txhua leej.

Ruam ua neej nyob ywj siab; ntse ua neej nyob lwj siab.

Tus ruam yeem pluag; tus ntse yeem tuag.

Yog peb hais tias peb yog neeg Ntseeg Ntuj, peb yuav tsum hluv cov tsis muaj av tsuj.

Yog tus ntiv taw twg mob, tus ntawv haj yam dawm loj pob.

Ruam nyiam hais lus maj; ntse nyiam hais lus tshaj.

Tus neeg tsis ntshai tuag ces nws yeej dab; tus neeg tsis ntshai tshaib plab ces nws yeej kev pluag.

Yog koj yog ib tus neeg nyiam zoo meej koj yuav ua tsis tau ntau yam.

Yog ua thawj zaug es tau zoo meej ces yog muaj hmoo.

Ntov ntoo saib seem; hais lus saib fab.

Tus neeg nplua nuj Ntuj tsis khaiv; tus neeg txawj txuj Ntuj tsis xaiv.

Yog thaum dej nro es tsis pom qab thu ces thaum yus chim los tsis pom qab xav.

Coob leej ua npau suav tabsis tsawg leej thiaj ua tau yuav.

Tus neeg tso paus tsis hnov nws paus tsw.

Tsob ntoo twg txi txiv hnyav tshaj nws cov ceg ces yuav ntshau; tus neeg twg ev hnyav tshaj nws lub duav ces yuav vau.

Pom tshiab ua rau xav hnav; pom qab ua rau xav noj.

Noj tsau ces dhuav; noj ntau ces ntuav.

Ruam hais lus kom mob siab; ntse hais lus kom yog ntsiab.

Ntse paub zam txim; ruam paub khaws chim.

Tub nkeeg ncauj ncab; tub sab ncauj nte – qub.

Ntse los tsuas khwv txaus nws coj; ruam los tsuas thov txaus nws noj.

Txuj ci zoo li lub hli – tsuas ci thaum tsis muaj lub hnuv.

Ib txhais tes npuaj tsis nrov; ib txhais taw sawv tsis ntseg–qub. Los ntawm Txoov Neeb Xyooj.

Tsis yog yus num txhob mus thab; tsis yog yus Dab txhob mus teev.

Neeg ruam hais lus mob; neeg ntse hais lus tob.

Neeg siab luv feem ntau yog neeg ntse; neeg siab me feem ntau yog neeg loj.

Ib koog zoov yeej muaj ib tsob pos; ib lub zos yeej muaj ib tug khaub.

Muaj zoo txuj tsis qhia ces yuav ploj; muaj zoo noj tsis siv ces yuav puas.

Neeg ntshai yam neeg tsis paub; neeg xaub yam neeg tsis pom.

Muaj peb hom neeg: 1) ua tau, 2) xaiv tau, thiab 3) xav tau.

Tus neeg paub tab ces tsis ntshai Dab; tus neeg paub txuj ces tsis ntshai Ntuj.

Coob leej neeg xav ntse, tabsis tsawg leej neeg xav kawm.

Ruam noj tsuav yog qab; ntse noj tsuav yog tsis muaj kab.

Thaum hluas nyiam noj qab zib; thaum laus nyiam noj qab tsib.

Ruam hais zog; ntse hais yog.

Yog tsis muaj Tswv Ntuj ces foom yeej tsis khaum.

Tus ua kev phem yuav tuag txom nyem; tus ua kev zoo yuav tuag nto moo.

Tsiaj txhu tuag ces tsov noj; tsov tuag ces tsiaj txhu loj.

Tus neeg ua phem vim nws tsis tau pom Tswv Ntuj.

Neeg tsis pom Ntuj, tabsis Ntuj pom neeg.

Ntes yoov ntes lawv qab; ntes nab ntes tuav tw.

Hnov tsw lwj ces yog muaj poj ntxoog; hnov tig toog ces yog muaj dab.

Ib koog zoov yeej muaj ib tug nab; ib koog tsua yeej muaj ib tug dab.

Txoj kev ua neej nyob ces zoo li tho kev: tus tho ncaj ces tsuas poob tsag, tabsis tus tho nkhaus ces poob tsua.

Txhua yam neeg ua txawm phem thiab zoo los puav leej rov los rau neeg ntoo.

Pluag npaum cas los txhob tub sab; ncab npaum cas los txhob tub nkeeg.

Tus neeg ncaj luag nyiag los tsis pluag; tus neeg nquag luag mob los tsis nkees.

Tus neeg siab dub yuav tuag rau chaw tsaus; tus neeg siab nkhaus yuav tuag rau chaw phem.

Tus neeg ua zoo Tswv Ntuj hlub; tus neeg ua pub Tswv Ntuj qhuas.

Neeg plab hlaub yiag ntxiag yog neeg ev tsis taus qoob; neeg plab hlaub ntug ntoob yog neeg ev taus hnyav.

Neeg pluag noj tsis txuag; neeg muaj noj tsis seem.

Thaum peb hloov peb txoj kev xav ces yam peb ntsia los yeej txawv txav.

Tus ntshaw txoj kev plees yuav puas rau txoj kev nrauj.

Xub pom qhov dub ces tsis hlub; xub pom qhov zoo ces tsis nroo.

Ntov tsob ntoo ces tau txiv noj ib pluag, tabsis de txiv noj xwb ces ntau tiam noj los tsis paub tsuag.

Tsiaj ntse txawj cog qoob; tsiaj ruam tsuas paub nqos noob.

Txiv tsis raug hnuv txiv tsis liab; neeg tsis raug kub neeg tsis ris siab.

Neeg yuam kev vim yog kev maj; neeg muaj teeb meem vim yog tsis ceev faj.

Tsis yog mus txoj kev ncaj es thiaj txog, tabsis yuav tsum taug txoj kev yog es thiaj tshwm.



Yog koj tsis xav tias muaj ntshw ces txawm koj tuav nws tw los koj yuav tsis paub.

Xav~ ntau ces thiaj li tau; xav~ paub ces thiaj li ciaj Saub.

Tus txawj tsis nco los qhia; tus ntsia tsis nco los saib.

Tus neeg pluag los tshaib nyiaj; tus nquag los tshaib plab.

Thaum neeg ntshaw nyiaj, neeg tsis nco qab txog kev tsim txiaj.

Twv tau txiaj yuav ua rau yus pluag; khwv tau nyiaj yuav ua rau yus nquag.

Qia dub yog thawj kauj ruam ntawm kev muaj nyiaj; tsim txiaj yog thawj kauj ruam ntawm kev muaj hmoo.

Hlub tus muaj ces tau meej mom zoo; hlub tus pluag ces tau Ntuj koob hmoo.

Tus neeg ncaj nces thov ntuj ces ntuj pub; tus ruam thov ntuj ces ntuj hlub.

Tus hais qhia yog tus tsis paub ua; tus hais tshua yog tus tsis paub hlub.

Yam yus nyiam ces ua zoo; yam yus nroo ces ua puas.

Ntshaw noj qab tshaj tshaib noj.

Hais lus hlub ces sib tshua; hais lus ntsub ces sib tua.

Ruam ntshai ua yuam kev; ntse ntshai ua luag qhev.

Yuav thaum tshiab, tabsis xav rau thaum qub; yuav thaum hlub, tabsis xav rau thaum ntsub..

Ruam ua neej vim txoj kev deev; ntse ua neej vim txoj kev seev.

Tus tau txij nkawm nquag thiab siab ntev ces yuav tau nom ua; tus tau txij nkawm tub nkeeg thiab siab dev ces xav mus dhia tsua..

Tsis txhob tham tus yus tsis kam yuav; tsis txhob tuav tus yus tsis kam hlub.

Tsis txhob saib tsiaj pub zaub; tsis txhob tu plaub saib neeg.

Txawm ntse thiab ua nom loj npaum li cas los yuav khiav tsis dhau txoj kev khaum yog tias yus coj tsis ncaj.

Yog muaj sibceg ces yuav muaj sib ntaus; yog muaj sibntaus ces yuav muaj sib tua.

Tus neeg ncaj thov Ntuj pab; tus nkhaus thov Ntuj xyab.

Tus neeg siab ncaj thov Ntuj los; tus neeg siab phem thov Ntuj qos.

Cog paj ces tau txiv noj; cog pos ces tau saus coj.

Pom zaub mov qias ua rau tsis tshaib plab.

Ib tug qus nrog kaum tus seej ces nws seej; ib tug seej nrog kaum tus qus ces nws qus.

Tus neeg ntuas phem yog nws hlub; tus neeg ntuas ntxub yog nws tshua.

Ntawv raug los yuav tsum txawj ua zoo; muaj hmoo los yuav tsum yog txawj hlub.

Ua ntej yus yuav thuam, yus yuav tsum paub qhov tseeb; ua ntej yus yuav txeeb, yus yuav tsum paub qhov zoo.

Yog tau noj lawm ces yuav tsis xawb; yog tau tshawb lawm ces yuav tsis nrhiav.

Niaj hnuv ntaus ua rau luag ntxub; niaj hnuv hlub ua rau luag dhuav.

Ntaus ces mob tawv cem ces mob plawv.

Txhob ncaws dev es dev thiaj li tsis paub tom ko taw.

Thaum hluas ntshaw kev deev; thaum laus ntshaw kev hlub.

Yog tsis txom nyem txaus yuav tsis paub hlub; yog tsis ntsub txaus yuav tsis paub nco.

Tsis txhob muab ib txhais tes mus tuav ob tus ntse – Lostsuas.

Hlub ntiav ces khiav; hlub tob ces nyob.

Txawj ntxias ces tau kev hlub; txawj dag ces tau kev ntsub.

Tus ua dev ntsuav yog tus tau tuav; tus txaj~ muag yog tus tsis tau puag.

Tus neeg ntsub ces tsawg tus zov; tus neeg nyiam ces coob tus kov.

Ruam xav yuav poj Huab Tais; ntse xav yuav tus mloog hais.

Nyuj quav tsis tsw nyuj ntswg.

Yog tus yus hlub, yus tsis pom nws qhov dub.

Tus neeg muaj nyiaj hnav ntuag; tus neeg pluag hnav zoo.

Tsis pom dej dag siab tsis nqig–qub.

Zoo nraug ces tau nkauj Sua, tabsis txhais tsis tau tias tau neej zoo ua.

Neeg hais ntawm ncauj tias hlub, tabsis hauv neeg siab ces yeej dub.

Ntshaw dhau ces ntshaw tau; ntshai ntau ces ntshai tau.

Hla dej ces yuav tau hle khau; tsiv teb tsaws chaw ces yuav tau hle hau – qub.

Thaj av twg yog muaj nceb ces xyoo twg los yeej rov tuaj nceb.

Tus neeg ntse hais lus tsawg; tus neeg ruam hais lus tseeb.

Tho kev ncaj ces neeg taug; tho kev nkhaus ces neeg hla.

Xaiv~ tau paiv; xuas~ tau ruas -- qub.

Ruam xaiv tus zoo nkauj; ntse xaiv tus tsis nrauj.

Ruam xaiv tus muaj nyiaj; ntse xaiv tus tsim txiaj.

Yog tsis muaj ib tug dej tus, ces yeej tsis muaj ib tug neeg ncaj.

Piav kev plees ntau ces yuav sib deev; piav kev hlub ntau ces yuav sib tshua.

Ruam xaiv tus zoo tshaj; ntse xaiv tus coj ncaj.

Ntse ua txuj tsis nyiam kov; ruam ua hnuv ua hmo zov.

Ruam ua txhua yam kom tau hlub; ntse hlub txhua yam kom tau ua.

Thaum hluas xav ntsoov txog kev sib hlub; thaum laus xav ntsoov txog tej ntxhais thiab tej tub.

Zoo nkauj thiab dab tuag yog los ntawm lub ntsej muag.

Zoo nkauj thiab dab tuag yog pom ntawm tus saib lub qhov muag – Askiv.

Txheej nrauv zoo nkauj; txheej hauv zoo nrauj.

Txiv tawv ntxhib yog txiv noob qab zib.

Tus neeg kawm ntawv siab feem ntau yog tus dab tuag.

Nco~ luag thiaj tso; hlub~ luag thiaj ntsub.

Ruam xaiv tus zoo tawv; ntse xaiv tus zoo plawv.

Ruam xaiv tus hnav tshiab; ntse xaiv tus zoo siab.

Ruam xaiv tus nplua nuj; ntse xaiv tus txawj txuj.

Ruam xaiv tus du dais; ntse xaiv tus mloog hais.

Ruam xaiv lub cev; ntse xaiv lub tsev.

Cog txiv ces saib qoob; tseg noob ces saib loo lossis ntoo.

Thaum hluas muab zog pauv nyiaj; thaum laus muab nyiaj pauv zog.

Thaum yus pluag tsis muaj neeg hlub; thaum yus nquag tsis muaj neeg ntxub.

Yuav tus hluas saib tus laus; yuav tus ntse saib tus ruam.

Ib res nplej yeej muaj ib lub npluag.

Xav kom muaj nyiaj yuav tsum txuag nyiaj zoo tshaj yus ob lub qhov muag.

Neeg nplua nuj tsis xyob nyiaj; neeg muaj txiaj tsis nkim qhauv.

Tsis xav kom pluag yuav tsum khaws txhua yam yus muaj.

Txoj kev zoo me tshaj daim lag zeb; txoj kev phem dav tshaj ib plas teb.

Tau txij nkawm zoo ces neeg zej zog qhuas; tau txij nkawm phem ces raug neeg zej zog ntuas.

Ntov ntoo saib ceg qhuav – qub.

Poj dab ncauj ncab; poj qhe ncauj nte – qub.

Pluag los mag poj niam nrauj; nplua nuj los mag poj niam lauj.

Ruam los mag poj niam thuam; ntse los mag poj niam de.

Ruam muab dag zog mus phov; ntse muab kev txawj mus lov.

Tus neeg cev pham nphoob yog tus neeg zoo qoob.

Yus tsis nco qab hnuv, tabsis yus nco ntsoov tias tau hlub.

Tau ua ces nco li npau suav; tau tuav ces nco mus ib txhis.

Tus txawj kov tsis nco ntev npaum li tus txawj tshov.

Tus ruam npaj zog; tus ntse npaj yog.

Poj niam lus mos txiv neej lus nchav; poj niam siab nqaim txiv neej siab dav.

Riam ntse tsuas muaj npub; riam npub tsuas muaj hov.

Tsis yog ua ntau zaus es khov, tabsis yog ua zoo txaus es tsis lov.

Qhov noj qab tsis npaum qhov xav; qhov ua zoo tsis npaum qhov cav.

Lo lus txawv nyob hauv plawv; lo lus tshiab nyob hauv siab.

Hlub ntau dhau tsis sibtau; hlub tsis txaus tsis sibxaus.

Tus neeg tuag yeej yog tus zoo; tus ntse dim yeej yog tus loj – Askiv.

Tus ntoo muaj nplooj ntau yog tus ntoo ceg nkhaus.

Ua neej nyob tsis txhob qhia tag siab; tsam luag paub ces luag saib yus zoo li tus liab.

Thaum tsis tau hlub, pom poj niam zoo nkauj; thaum hlub tas, txiv neej muab poj niam nrauj.

Thaum tsis tau hlub poj niam tsis nco; thaum hlub tas poj niam tsis kam tso.

Tsis yuav tsis txhob hais tias hlub; tsam hlub tag ces tau ntuj dub.

Hlub coob leej tsis tau tus yuav; hlub tsawg dhau tsis tau tus tuav.

Yam yooj yim ces txhua leej txhua tus tsim; yam nyuaj ces txhua leej txhua tus ntshai.

Kev ua neej tsis yog loj thiab me tabsis yog kev txawj thiab ntse.

Ib rab riam ob sab ntse – qub.

Ib lub quav tsuag ua puas tag ib tsus mov – qub.

Riam tsis siv yuav xeb; tswm yim tsis nthuav yuav ploj.

Nyiaj kub los txawj poob nqis; kev hlub los txawj paub tsuag.

Lub tswv yim yuav tsum muab xav; xws li tsob ntoo uas niaj hnuv niaj hmo hlav.

Dag ruam ces ruam pub; dag ntse ces ntse ntsub.

Tau pov haum los yog yus tsis tsim txiaj ces yeej tsis muaj hmoo; tau ua niam poj Huab Tais los yog yus tsis ncaj ncees ces yeej tsis muaj zoo.

Tub pluag mus nrhiav pov haum thooob ntuj; tub nquag pib khwv ntawm nws taw tsuj.

Ruam noj ntau; ntse noj tsau.

Xav kom yuag yuav tsum yoo kom dhau peb hnuv; xav kom nplua nuj yuav tsum txuag nyiaj kom dhau peb hlis.

Zoov ntsuab vim yog zoo roob hav; qoob loo ntsuab vim yog muaj zoo av.

Txuj lom ua rau zaub mov ntxim qab; saw npab ua rau tib neeg ntxim nyiam.

Txiv neej ruam tuag rau nkauj Kub Kaws; poj niam ruam tuag rau nraug Kub Ko.

Tus neeg phem pom qhov zoo; tus zoo pom qhov phem.

Ruam ces noj yam qab hauv ncauj; ntse ces noj yam pab hauv nrog.

Xav pev thooob nraug, xav nraug thooob pev mam li ua thiaj tsis yuam kev.

Yuav tsum ntsuas ob lwm mas txiav ib zaug – Askiv.

Tus ntshai pluag yog tus txuag; tus ntshaw muaj yog tus khwv.

Neeg tsis nco kaum hnuv tshav, tabsis neeg cav kaum hnuv tsaus.

Cov me nyuam yug los me, feem ntau, yog cov me nyuam ntse.

Yog ua tag los yuav tsis loj thiab tsis yau ces tsis tas ua los tau.

Yog tau ua, ua kom yog thiab zoo es ua tag thiaj li yuav nto moo.

Lam taus lam ua ces yog yuav rov ua dua.

Coob leej hnov qeej nrov tabsis tsawg leej paub qeej suab.

Ua tsis yog rau lwm tus qhuas; ua kom yus qhuas thiab nyiam.

Muaj nyiaj muaj kub tsis zoo npaum muaj tus los hlub.

Thaum hluas ntshaw txoj kev dhia; thaum laus ntshaw txoj kev muaj sia.

Pas dej me tsis muaj ntse loj.

Niam txiv coj phem tub ki tau txom nyem; niam txiv coj zoo tub ki tau koob hmoo.

Tus neeg tsis muaj kev tsim txom tsis paub sib hlub; tus neeg tsis muaj kev ntxub tsis paub sib nco.

Yog dag me ntsis es yuav ua rau zoo siab ces zoo tshaj qhia lub ntsiab es ua rau chim.

Pluag tsis ntshai tuag; nquag tsis ntshai mob.

Hais txog kev kawm ntawv ces tus xub kawm yeej xub paub, tabsis hais txog kev paub los ntawm yawm Saub ces yog tus nws xaiv.

Tus neeg paub Ntuj hais lus saib Ntsuj; tus neeg paub ntawv hais lus saib plawv.

Yog tsis muaj Tswv Ntuj ces foom yeej tsis khaum.

Ib leeg muaj npau suav zoo tshaj kaum tus pw ua qaj; ib leeg sawv los tsaj zoo dua kaum tus pheej los qhia.



Riam npub cia tsoo txha; riam ntse cia hlais nqajj.

Ntse muaj nyiaj ces ntse tsis pluag; ruam muaj nyiaj ces ruam tsis txuag.

Tus neeg siab ncaj pw ces ua qaj qog; tus neeg siab phem ces pw tsis tsaug zog.

Tus ruam ntsia pom luag daim tiab; tus ntse ntsia pom luag nplooj siab.

Poj ntsuam txawj hlub; poj nrauj txawj ntsub.

Dev tsis paub tom tsis txhob ncaws dev.

Tsis muaj neeg xav ncaws tus dev tuag – Askiv.

Khaus twg khawb twg xwb – qub.

Ib tsob nplej yeej muaj ib lub noob qoos.

Ntse thuum ces ruam; ruam nthe ces ntse.

Tus neeg nkhaus hais lus tsis tag; tus neeg ncaj hais lus tsis dag.

Neeg siab phem cem tsis quaj; neeg siab tawv hlawv tsis ntshai.

Niam txiv nquag ces tub ki pluag; niam txiv muaj ces tub ki nkees.

Nyuj kub tsis hnyav nyuj hau – qub.

Nyuj tawv nyuj tsis pom dub; nyuj kub nyuj tsis pom ncau.

Nyuj quav nyuj tsis hnov tsw; nyuj tw nyuj tsis pom phem.

Kev twv txiaj yog kev pluag; kev nquag yog kev tau noj.

Daim teb tsis muaj nroj yog daim teb tsis zoo qoob.

Luag pom pos hniav ua rau luag khiav.

*Fear will make you poor and ignorant will make you stupid.*

*The difference between a robot and human is the ability to dream.*

*All human beings were created equally except their dreams.*

===== **XAUS LI NO XWB** =====

Kawg no, kuv vam thiab cia siab tias yuav muaj zaj puav lus Txuj Ci hauv phau ntawv no zoo thiab yuav pab tau nej. Zoo li tej noob txiv, txawm qoos thiab zoo npaum li cas los yog yus tsis muab cog ces tsuas muaj lwj xwb. Tabsis yog muab cog thiab niaj hnuv ywg dej lawd, tsuas yuav muaj nthaw kaus, tawg paj thiab tseem yuav huam vam mus thoob ntiaj teb los kuj tsis paub.

**Thank you for your interest in these quotes. If you believe that these quotes are worth reading and useful, please let me know. If I have enough positive feedbacks, I might consider putting these into a book. Otherwise, I will offer these quotes as random quotes on my website only.**

Warmest Regards,

Jay Xiong

<http://www.HmongDictionary.com>